

Dogri (NSD)

19-04-2026

खबरां

1. प्रधानमंत्री नरेंद्र मोदी होरें महिलाएं अगगे जोरदार अपील कीती ऐ जे ओहू सियासत च बधी-चढ़ियै हिस्सा लैन ते राश्ट्र दे विकास च अपना मते शा मता योगदान देन।
2. पच्छिम बंगाल ते तमिलनाडू च चुनां प्रचार तेज, बक्ख-बक्ख पार्टियों दे लीडर ते स्टार प्रचारक मते-मते लोकें गी अपने हक्क च करने लेई अपनी पूरी टिल्ला ला करदे न।
3. बीजेपी नै पच्छिम बंगाल सरकार ते कांग्रेस पार्टी पर महिला बरोधी होने दा दोष लाया। टी.एम.सी अध्यक्ष ममता बनर्जी होरें आखेआ कि बीजेपी लोकें गी गुमराह करै करदी ऐ।
4. भारत नै गोआंडी सब्बनं शा पैहले आहली अपनी नीति गी दोहरांदे होई श्रीलंका कन्नै अपने दक्खी सरबंध होर निगगर करने दा धेइया फही पक्का कीता।
5. तमिलनाडू च इक पटाका फैक्टरी च धमाके कारण 21 जनें दी मौत, 6 गंभीर तौरा पर घायल।
6. अक्षय तृतीया दे मौके पर उत्तराखंड च गंगोत्री ते यमोत्री धाम दे कपाट खुल्लने दे कन्नै गै सलाना 4 धाम जात्तरा शुरू होई गई ऐ।
7. आई.पी.एल च पंजाब किंग्स ते लखनउ सुपर जायंट्स बश्कार मकाबला शुरू होने आहला ऐ ते दक्खन अफ्रीका च एल्लै भारती महिला टीम दा 5 अी-20 मैचें दी श्रृंखला दा दुआ मैच मेजबान टीम कन्नै चलै करदा ऐ।

<><><><><><>

PM

प्रधानमंत्री नरेंद्र मोदी होरें अज्ज महिलाएं अगगे अपील कीती ऐ जे ओहू सियासत च अगगे औन तां जे देसै दे विकास च महिला सशक्तिकरण दा योगदान होर बधी सकै। उनें आखेआ कि नारी शक्ति दी हिस्सेदारी दे बगैर ना ते देस दी पूरी तरक्की मुमकिन ऐ ते नां गै उंदे बगैर देशै गी 2047 तगर इक विकसित मुल्ल बनाने दा सुखना पूरी चाल्ली मूर्त रूप लेई सकदा ऐ। उनें आखेआ कि बीजेपी महिला सशक्तिकरण दा गै पर्यायवाची ऐ।

<><><><><><>

PM-Bankura

प्रधानमंत्री नरेंद्र मोदी होरें अज्ज पच्छिम बंगाल दे बांकुरा विष्णुपुर च इक बड़ी चुनां रैली गी संबोधित कीता। औंदे विधानसभा चुनां दे प्रचार ते तैहत उनें तृणमूल कांग्रेस पार्टी दी सख्त नुक्ताचीनी कीती। प्रधानमंत्री होरें आरोप लाया जे टीएमसी ते कांग्रेस नै मिलियै संसद च महिला आरक्षण बिल गी रोकने दी साजिश रचली, जेहड़ा जे बंगाल दिएं महिलाएं कन्नै इक विश्वासघात ऐं उनें भ्रष्टाचार ते हिंसा दा आरोप लाया ते आखेआ जे पच्छिम बंगाल सरकार च भ्रष्टाचार अपनी हर पार करी चुके दा ऐ। उनें आखेआ जे अपराधिऐं गी लोड़चदा ऐ कि 29 अप्रैल तगर आपूं अपने आपै गी कनून द हवाले करी देन कीजे ओहदे बाद कुसै बी अपराधी गी बख्शेया नेइ जाह्ग। मोदी होरें आखेआ जे मजूदा टीएमसी दे मनै च गरीबें कमजोरें लेई मनै च कोई कयास या हमदर्दी नेई ऐ ते तृणमूल कांग्रेस नै राज्य च जंगल राज बनाइयै रक्खे दा ऐ। उनें बांकुरा दी टेराकोटा कला दी सराहना करदे होई आखेआ कि पी.एम विश्वकर्मा योजना राएं एह कारीगर मता फैयदा हासल करी सकदे ना। उनें आखेआ कि जेकर पच्छिम बंगाल सरकार आम लोकें दी हमदद्र होंदी तां केंद्र सरकार आसेआ शुरू कीती गेदिऐं भलाई-बेहतरी आहली स्कीमें गी लागू करने च अड़चना पैदा नेई करदी। प्रधानमंत्री होर अज्ज गै पुरुलिया, झाड़ग्राम ते मेदिनीपुर च बी चुनां ैलिएं गी संबोधित कीता। पच्छिम बंगाल च दो गेड़ें च 23 ते 29 अप्रैल गी वोट पोआए जाने न ते चुनाएं दे नतीजे 4 मई गी घोशित कीते जाडन।

<><><><><><>

Mamta-Rally

तृणमूल कांग्रेस दी अध्यक्ष ते पच्छिम बंगाल दी मुख्यमंत्री ममता बनर्जी होरें अज्ज हुंगली ते पूर्व धर्ममान जिले च चुनां रैलिएं गी संबोधित कीता। ममता होरें बीजेपी पर दोश लाया जे ओहू लोकें गी गुमराह करै करदी ऐ। कांग्रेस, खब्बे धड़े दिऐं पार्टिएं ते होरनें सियासी दलें बी पच्छिम बंगाल विधानसभा चुनां लेई अपना प्रचार होर तेज करी दिता ऐ।

<><><><><><>

Add-PM WB

पच्छिम बंगाल च चुनां प्रचार पूरे जोरें-शोरें जारी ऐ। बक्ख-बक्ख पार्टिएं दे लीडर चुनां रैलियां ते रोड शो करियै अपने-अपने मेदवारें दे हितै च प्रचार करा करदे ना। बड़ु-बड़ु लीडर ते स्टार प्रचारक अपने समर्थन आहलिएं पार्टी दे हक्कै च मते वोटर खिच्चने लेई अपनी पूरी टिल्ल ला करदे ना।

<><><><><><>

TN-Campaign

तमिलनाडु च भाजपा दे वरिष्ठ नेता ते केंद्री गृह मंत्री अमित शाह होरें अज्ज इरोड जिले दे शिवगिरी ते मोडाक्कुरिची च चुनाऽ प्रचार कीता। जनसभाएं गी संबोधित करदे होई उनें आखेआ जे राज्य च ए.आई.ए.डी.एम.के. महासचिव पलानीस्वामी हुंदे नेतृत्व आह्ला एनडीए इक मजबूत ते सफल गठबंधन ऐ। उनें डीएमके सरकार दी निष्क्रियता ते जन कल्याण दी उपेक्षा दी आलोचना कीती। नमक्कल च चुनाऽ प्रचार करदे होई ए.आई.ए.डी.एम.के. महासचिव एडप्पाडी के पलानीस्वामी होरें आखेआ जे सत्ता च आने पर उंदी पार्टी करसानें गी 14 सौ यूनिट मुफ्त बिजली मुहैया करोआग। उनें एहू बी आरोप लाया जे पिछली ए.आई.ए.डी.एम.के. सरकार दरान शुरू कीती गई। कई कल्याणकारी योजनाएं गी डीएमके नै बंद करी दित्ता। टीवीके नेताएं गी अपने चुना प्रचार तहत त्रिची पूर्व च रोड शो कीता।

<><><><><><>

V.P-Srilanka

उपराष्ट्रपति सी.पी. राधाकृष्णन होरें अज्ज कोलम्बो च श्रीलंका दे राष्ट्रपति अनुरा कुमारा दिसानायके हुंदे कन्नै मुलाकात कीती। दोनें नेताएं दोनों देशें बश्कार बहुआयामी सरबंधें गी होर मजबूती देने आस्तै कई मुद्दें पर सार्थक विचार विमर्श कीता। बैठक दरान श्री राधाकृष्णन होरें पड़ोसी प्रथम नीति आस्तै भारत दी प्रतिबद्धता दोहराई ते आपसी प्रगति ते विकास च सहयोग जारी रखने पर जोर दित्ता। श्री राधाकृष्णन होरें श्रीलंका दी प्रधानमंत्री डॉक्टर हरिणी अमरासुरिया कन्नै बी मुलाकात कीती। दवें नेताएं जनता दे आपसी सरबंधें समेत दपक्खी सरबंधें गी होर मजबूत करने दे महत्वे पर चर्चा कीती।

<><><><><><>

Iran US Hormuz

ईरान ने आखेआ ऐ जे जिसलै धोड़ी ईरानी बंदरगाहें थमां अमरीकी नाकेबंदी नेई हटाई जंदी, तदुं धोड़ी होर्मुज जलडमरूमध्य बंद रौह्ग। इस्लामिक रिवोल्यूशनरी गार्ड कॉर्प्स (आईआरजीसी) ने अमरीका आसेआ जारी नाकेबंदी गी युद्धविराम दिएं शर्तें दी उल्लंघना करार दित्ता ते चेतावनी दित्ती जे जलडमरूमध्य दे कोल औने आहले कुसै बी ज्हाज गी दुश्मन मन्नेआ जाह्ग ते उसी निशाना बनाया जाई सकदा ऐ। एहू हालात जंदे शुक्रवारें जलडमरूमध्य गी आरजी तौर पर परतियै खोले जाने दे बाद बने न। हालांकि, अमरीकी राष्ट्रपति डॉनल्ड ट्रंप होरें आखेआ ऐ जे ईरान दे कन्नै सबनें मुद्दें दा पूरा हल कड़ी लैते जाने तगर नौसैनिक नाकेबंदी लागू रौह्ग।

North-Korea

दक्खन कोरिया ने अज्ज आखेआ ऐ जे उत्तर कोरिया ने अपने पूर्वी जलक्षेत्र आहली बक्खी केई बैलिस्टिक मिसाइलां दागियां न। दक्खन कोरिया दे ज्वाइंट चीफ्स ऑफ स्टाफ ने दस्सेआ जे एह प्रक्षेपण बड्डलै उत्तर कोरिया दे पूर्वी सिनपो इलाके थमां कीते गो। उ'नें दस्सेआ जे दक्खन कोरिया ने अपनी निगरानी गी होर मजबूत करी दित्ता ऐ ते अमरीका ते जापान देक नै लगातार जानकारी सांझी कीती जा'रदी ऐ। तोआई, जपान दे रक्षा मंत्रालय ने बी तसदीक कीती ऐ जे उत्तर कोरिया ने इक संदिग्ध बैलिस्टिक मिसाइल दा प्रक्षेपण कीता ऐ।

<><><><><><>

SC-Express

सुप्रीम कोर्ट नै मुल्ख भरे च शिड़क सुरक्षा बदाने आस्तै दिशा-निर्देश जारी कीते न। अदालतै आखेआ ऐ जे प्रशासनिक चूक या बुनियादी ढांचे दी कमी करी एक्सप्रेस वे खतरें दा गलियारा नेई बनने लोड़चदे। न्यामूर्ति जे.के महेश्वरी ते ए.एस चुंदरकर हुंदी पीठ नै आखेआ जे भारत दे कुल शिड़क नेटवर्क च राश्ट्री जरनैली शिड़कें दा हिस्सा छड़ा 2 फीसद ऐ पर शिड़क हादसे च होने आहली मौतें च इंदा हिस्सा करीब 30 फीसद ऐ। अदालतै शिड़क परिवहन ते जरनैली शिड़कें सरबन्धी मंत्रालय, जरनैली शिड़कें सरबन्धी भारती प्राधिकरण ते सारे राज्यें ते केंद्र शासित प्रदेशें गी जरनैली शिड़क पर सुरक्षा च सुधार आस्तै फौरी गैड पुट्टने दे निर्देश दित्ते न।

<><><><><><>

ISRO-G-20

भारती अंतरिक्ष अनुसंधान संगठन-इसरो दे अध्यक्ष डॉ. वी नारायणन होरें आखेआ ऐ कि जलवायु, ब्हा दे प्रदूषण ते मौसम दी निगरानी सरबन्धी अध्ययन लेई डिजाइन कीते गेदे जी-20 उपग्रह गी 2027 च अंतरिक्ष च भेजेआ जाई सकदा ऐ। उनें आखेआ कि भारत इक राकेट दा इस्तेमाल करियै बिजन कुसै टकराव दे 100 कोला मते उपग्रह कक्षा च स्थपित करने आहला दुनिया दा पैहला देश ऐ। डॉ. नारायणन होरें एह गल्ल हैदराबाद च इंजीनियरिंग स्टाफ कालेज ऑफ इंडिया च डी.आर.डी.ओ, इसरो ते एरोनाटिकल सोसायटी ऑफ इंडिया दे वैज्ञानिकें गी संबोधित करदे होई आखी। उनें आखेआ कि जी-20 देशें लेई जी-0 उपग्रह गी प्रक्षेपित करने च भारत इक अगुवा दी भूमिका निभा करदा ऐ।

<><><><><><>

E.D-Raids

माली नियमे कायदे लागू कराने सरबन्धी निदेशालय ई.डी नै कोलकाता पुलस दे डिप्टी कमिशनर शांतनू सिन्हा बिस्वास हुंदे केई ठकानें पर छापेमारी कीती। अज्ज बडुलै ई.डी दिएं टीमें केंद्री थेआरबंद बलें गी कन्नै लेइयै शांतनू हुंदे फर्नरोड स्थित बंगले ते बालीगंज च बी छापेमारी कीती। एहू छापेमारी लोकें दिएं जिमिएं पर जबरदस्ती नजैज कब्जे करने ते कोयला तस्करी मामले दी जांच कन्नै जुड़ी दी ऐ। जानकारी मुजब शांतनू सिन्हा बिस्वास ते फरार हिस्ट्री शीटर सोना पप्पू बश्कार पैहे दे लैन-देन दी जांच कीती जा'रदी ऐ। शांतनू सिन्हा बिस्वास गी कोयला घोटाले आहले मामले च पैहले बी ई.डी आसेआ पुच्छ-गिच्छ लेई दिल्ली तलब कीता गेआ हा पर अजें धोड़ी ओहू उत्थे पेश नेई होआ। शांतनू बिस्वास पैहले कालीघाट पुलस स्टेशन दे अफसर प्रभारी बी रेही चुके दे न।

<><><><><><>

T.N. Blast

तमिलनाडू च अज्ज दपैहरी विरूधुनगर जिले दे मुथुलिंगपुरम च पटाके दी इक फैक्टरी च होए दे जबरदस्त धमाके च 21 जनें दी मौत होइ, गई ते 6 गंभीर तौरा पर घायल होई गेदे न जिंदा अस्पतालै च इलाज चलै करदा ऐ। एहू हादसा उसलै पेश आया जिसलै मजदूर धमाकाखेज सामग्री इक फैक्टरी दे अंदर इक थाहरा दुई थाह लेई जा करदे हे। धमाके दे समे कारखाने दे 4 कमरे च 30 कोला मते मजदूर मजदूर हे।

<><><><><><>

Char-Dham

अक्षय तृतीया दे पवित्तर मौके पर यमुनोत्री ते गंगोत्री धाम दे कपाट खुल्लने दे कन्नै गै अज्ज उत्तराखंड च सलाना चार धाम यात्रा दी शुरूआत होई गई ऐ। गंगोत्री मंदर दे अंदर देवी गंगा हुंदी मूर्ति ते यमुनोत्री मंदर गी फुल्ले कन्नै बडे शैल सनाखड़े ढंगै नै सजाया गेदा हा ते सुरक्षा दे निगगर बंदोबस्त कीते गेदे न। तोआई, केदारनाथ धाम दे कपाड 22 अप्रैल ते बद्रीनाथ धाम दे कपाट 23 अप्रैल गी खुल्लडन। इस यात्रा लेई अजें धोड़ी 20 लक्ख कोला मते लोकें अपना पंजीकरण कराई लैते दा ऐ।

<><><><><><>

Akshay-Tritya

अक्षय तृतीया दा ध्यार अज्ज पूरे मुल्लखै च पारम्परिक शरदा ते उत्साह कन्नै मनाया जारदा ऐ। एहू ध्यार खरे भागें खुशहाली ते कामयाबी दा प्रतीक ऐ। इस ध्याड़े लोक देवी देवताएं अगगे जीवन च सुखा, समृद्धि ते कामयाबी दी प्रार्थना करदे न। समूलचे मुल्लखै च अज्ज परशुराम जयंती बी मनाई जा'रदी ऐ। भगवान परशुराम विष्णु भगवान हुंदे 6में अवतार हे। प्रधानमंत्री नरेंद्र मोदी होरें अज्ज अक्षय तृतीया ते परशुराम जयंती दे मौके पर देशवासिएं गी शुभकामनां दिंदे होई सब्बनें दी सलामती, तरक्की ते खुशहाली दी कामना कीती ऐ।

<><><><><><>

IPL

आई.पी.एल क्रिकेट च अज्ज दऊं मैच खेड्डे जाने हे। पैहला मैच दिनें कोलकाता दे इडन गार्डन्स च कोलकाता नाइट राइडर्स ते राजस्थान रायल्स बश्कार खेड्डेआ गेआ जेहड़ा Kokatta Night Riders दी टीम ने 4 विकेटें कन्नै जित्ती लैता। पैहले बल्लेबाजी करदे होई Rajasthan Royals नै 20 एं ओवरें च 9 विकेटें दे नुकसान पर 155 रन बनाए जेदे परते च Kokatta दी टीमै 19 ओवर ते 4 गेंदें च 6 विकेटें दे नुकसान पर 161 रन बनाए ते मैच जित्ती लैता। अज्जै दा दुआ मैच हुनै कोला किश चिर मगरा चंडीगढ़ च पंजाब किंग्स ते लखनऊ सुपर जायंट्स बश्कार शुरू होने आह्ला ऐ। लखनऊ दी टीमै टास जित्तिy पैहले गेंदबाजी करने दा फैसला लैता ऐ। जंदी रातीं इक मकाबले च सनराइजर्स हैदराबाद नै चेन्नई सुपर किंग्स गी 10 रन कन्नै हराया हा।

<><><><><><>

Women-Cricket

महिला क्रिकेट च भारत ते दक्खन अफ्रीका बश्कार मजूदा 5 टी-20 मैचें दी श्रृंखला दा दुआ मैच एल्लै डर्बन च चलै करदा ऐ। मेजबान टीम नै टॉस जित्तिy पैहले गेंदबाजी करने दा फैसला लैता ऐ।

<><><><><><>

BCCI-Agarkar

भारती क्रिकेट कंट्रोल बोर्ड बी.सी.सी.आई नै सीनियर ताल कमेटी दे अध्यक्ष अजीत अगरकर हुंदा कार्जकार इक बरे लेई बधाई दिता ऐ। एह फैसला 2027 दे इक रोजा क्रिकेट विश्व कप दिऐं तैयारिएं गी ध्यानै च रखदे होई लैता गेआ ऐ। अगरकर हुंदे नेतृत्व च अक्तूबर 2023 कोला मार्च 2026 दे बश्कार चुनी गेदी टीमां 4 आई.सी.सी.आई टूर्नामेंट दे फाइनल च पुजियां हियां। इंदे च 2 टी-20 क्रिकेट विश्व कप ते इक आई.सी.सी चैंपियन्स ट्रॉफी दे फाइनल च जित्त शामिल ऐ।

<><><><><><>

Weather

मौसम विभाग नै पूर्वी राजस्थान, पूर्वी उत्तर प्रदेश, झारखंड ते ओडिशा च कल लू चलने दी पेशगोई कीती ऐ। मौसम विभाग नै अगले दो दिनें दरान तटीय आंध्र प्रदेश, तटीय कर्नाटक, तमिलनाडु, पुदुचेरी ते काराईक्काल च गर्म ते उमस भरे दे मौसम दी मेद दस्सी ऐ। अरुणाचल प्रदेश, असम ते मेघालय च 22 अप्रैल तगर तेज वर्षा होने दी बी मेद ऐ। उत्तरी आंतरिक कर्नाटक च अगले 2 दिनें तगर गरज-चमक कन्नै ऐन-गढा बी पेई सकदा ऐ। पश्चमी मध्य प्रदेश, मध्य महाराष्ट्र, मराठवाड़ा, छत्तीसगढ़, पश्चिम बंगाल दे प्हाड़ी इलाके, सिक्किम ते पूर्वोत्तर राज्यें च गरज-चमक कन्नै बरखा दे असार ना। दक्षणी कर्नाटक, तेलंगाना, विदर्भ, आंध्र प्रदेश, केरल, माहे, कोंकण ते गोवा च बी नेई गै स्थिति बनी दी रौहग। कश्मीर दिऐं उच्चिएं धारें पर ताजा बर्फबारी होई ते मैदानी इलाकें च बरख पेई। इस वजह करी तापमान च खासी गिरावट दर्ज कीती गेई ऐ। बांडीपोरा जिले दी गुरेज घाटी दे तुलैल इलाके च बर्फबारी होई ऐ। सोनमर्ग इलाके दे जोजिला पास दी दौनें भेठा बर्फबारी होई ऐ। घाटी दे मैदानी इलाकें च हल्की थमां दरम्याने दर्जे दी बरखा होई। मौसम विभाग दा आखना ऐ जे एहदे कन्नै तापमान हुन बेहतर होई जाह्ग। बर्फबारी ते बरखा करी तापमान च किश गिरावट औने दी मेद ऐ।

<><><><><><>